

Piimäkuu

17. päiv
2008

Nummör
13 (157)

Leht mass erälde
ostõn 5 kruuni

UMƏ LEHT

V Ö R O M A A R A H V A U M A N K E E L E N L E H T

**Proskini Aivo kõnõlõs vanast
tehnikast ja romurallist**

Kae lk 2

**Võromaa kihlkunna –
Räpinä**

Kae lk 3

**Ruitlanõ: kas Urvastõst
saa Turvastõ?**

Kae lk 4



Võrokiilne sari ETVn

Seost puulpäävast, 21. piimäkuust pääle saa ETVst egä puulpäävä kell 20.15 näta võrokeelitsit saatõjupikõisi nimega «Üts tego». Saatõjupõ om kokko 16, egänüten kõnõldas määndsestki inemise tegemisest, märgotõdas clost, olnust ja olõvast.

Edimäne saadõ (21.06) kõnõlõs hobõsõ ravvutamistõst, tõnõ (28.06) lehmä nümismist. Edeci tulõ viil juttu kalapüüdmissist, mařakorjamistõst ja muust.

Safa «Üts tego» autori omma Rõõmu Grethe ja Ruitlasõ Olavi. Võrokeelist juttu lugõva näütlejä Jäägri Merle ja Kütsari Riho. Saatidõ tegemise vidäjä om Rebäse Tiina, režissõõr Kargu Mati, pildi võtõ üles Mägi Arvo ja valgusõga mäng Arvi Sten. Saatidõ tegemist tugi riiklinõ programm «Lõunacesti kiil ja kultuur».

UL

Veesaarõ Anne avitas Vinne aigu miilde tulõta

Võromaalt Karula kihlkunnast peri näütlejä Veesaarõ Anne kuts mi kandõ rahvast 21. piimäkuul Kubija laululava pääle. Sääl naatas laulma säandsit laulõ nigu timä noorõpõlvõ pidodõl, kontsõrdi nimi om «Sotspop».

«Noorõ laulja laulva noid laulõ, midä muvannudsõ ja veitkese vanõmba inemise tiidvä väega häste,» seletäs Veesaarõ Anne, kiä esi kah laulma nakkas ja lupa lava pääl ka tsipakõnõ võro kiilt pruuki.

«Tuu es olõ määnegi pümme aig!» ütles Veesaarõ Anne uma noorõpõlvõ-ao kotsilõ. «Mu uma 22-aastanõ poig kullõl kah

noid tuuaigist laulõ ja imehõ, et kae, tuu laul om nii vanast aost peri.»

Näütlejä tulõtas lämmä tundõga miilde, kuis umal aol sai eski 15 kilomiitret jalaga pidolt kodo mintõs ja elo jää es elämälä, kukki pidokängi olõ õs saia ja rõiva tull kah hindäl ummõlda.

Kontsõrdil tege Joala Jaaku perrä nuur laulja Pringi Bert ja Veesaar kitt, et häste tege. Rahvalõ om inämb teedä tuu, kuimuudu mõist Veski Annet perrä tetä Pürgi Pille, kedä kah «Sotspopi» kontsõrdil näta saa.

UL



President tekõ vallalõ vana Võromaa piirisildi.

13. piimäkuu pääväl sai Võro-Tarto tii pääl, Valgjärve vallan Abissaarõ külän kokko hulk tähtsist inemiisi ja paiklikku külärhvast. President Toomas Hendrik Ilves pidi kõnnõ ja tekõ pidolidsõit vallalõ vana Võromaa sildi.

Äsalõ anni värimi ettevõtmist tervütämä tulnu esindäjä Seto- ja Mulgimaalt. Mõlõmba näütsi umma esierälist olõmist (mulgi rõhuti umma ihnsust ja seto vigurilisust). Tuu tekõ säändse tundõ, nigu olõsi kokko saanu hõimupääligu 800 aastaga iist. Üten presidenti ja timä ilosidõ sõnnoga sai tunda ütteeaigu väega vannamuudu ja väega vahtsõt muudu eesti rahva ütenolõmisõ-tunnõt. Ettevõtmistõst es jää kõrvalõ ka paikliku inemise: väiku pildi pääl seletäse külämehe kotussõnimmii uurjalõ Saarõ Evarilõ, kost täpsele umal aol Võromaa piir õks juusknu om. **HARJU ÜLLE** jutt ja pildi

Sika Alari ja Looduse Omnibussiga Mustajõõ ja Koiva pääl

RAHMANI JAN
info@umaleht.ee

Neläpäiv. Kiri postkastin and teedä, et Looduse Omnibuss lätt Sika Alari ja timä velega Mustajõõ ja Koiva pääle. Tetäs üts paadisõit, joba katõ päävä peräst, puulpäävä.

Toimõndaja arvas, et saanu hää luv, ku saatnu Ruitlasõ näidega ütten. Ma ei olõ tuuga nõun: mille nii hääd asja Ruitlasõ pääle raisada. Lää parõmb esi, olõ-i paadiga väega sõitnugi ja sulg või kah rostõlõ minnä, ku õnnõ tõisil kirota lasõ.

Puulpäiv. Buss om jõudnu Võro kerigu ette. Ussõ man ajasõ juttu matkamii Sika Alar ja luudusõsõitõ kõrraldaja Riisi Jaan. Sõit lätt Tellingumäele Taheva sanatooriumi lähkül. Sika Alar lupa iin sõita.

A bussijuht olõ-i celä sündünü. Tä tiid esi kah, kuis sõita. Liinast välän vaotas tä lapadsi põhja. Sõidami müüdä sõiduautist, ka üttest Land Cruiseri džiibist. Näc bussiaknõst, et maastigumassina roolin om Sika Alar.

Buss om rahvast täüs, inämbüisi keskiälidse liinainemise. Paistus, et sõit Looduse Omni-

bussiga om näide jaos puhkus kontoritüüst. Ja ku ausalõ üteldä, tunnõ ma piaaigu sammamuudu. Mu kõrval istus üts naistõrahvas. Tä kõnõlõs, et maiul omma tõistmuudu katusõ, ku muial Eestin. Näkev vanna muudu vällä ja tuu olõv väega põnnõv. Nooguda viisakusõ peräst, a kuigi jääs tuu jutt minno vaivama. Niimuudu kaegi ülejäünü sõidu aigu õnnõ majakatussit. Omma eterniidist vai sis mulklidsõ lastukatusõ.

Tellingumäel saadõtas rahvas ütles torni. Ma ei lää, seo keväjä olõ kats kõrda sinnä torni joba roninu. Avitas külh.

Pikält mõlotama ei jääki. Kiä tornin käünü, lätt mäest

ala. Sääl juusk Mustjõõgi ja sääl uutva meid kummipaadi. Om katõ-inemise paatõ, om kuvvõ-inemise paatõ ja om ka säandsit, kohe kümme inemist pääle või istu. Ma lää kõgõ suurõmbahe, seldsin om segätsemb.

Paadiga vii pääl

Pääle pästeveste sälgäandmist ja väikut koolitust lastas meid vii pääle. Alostus om kecrulinõ. Ma trehvä etteotsa ja taadõpoolõ om trehvänü hulk säandsit, kiä tahtva väega opada. Arvada koolioppaja. Nii omgi sõidu alostus üt paras rüükmine, kos soovitõdas läbisegi hääle vai kuralõ käändä ja tundus, et takanpuul sõudja ei olõ iinpuul sõudjidõga rahul.

Õnnõs ma ja tuu halli habõnaga mehekene, kiä tõõsõl puul istus, tuust tsäägatamisõst suurt vällä ei tii. Sõitu tulõ rahuligult võtta, niimuudu om Sika Alar meile mõnõ minodi iist opanu. Takanpuul istja ei olõ vist tuud oppust kõrraligult kullõlnu.

Mustjõõgi käänd ja om nii sükäv, et põhi ei paistu. Harõtami sõitmist ja kaemi kikkapuid, miä pervi pääl häitsese. Mõnõ ao peräst tulõ Koiva vasta. Jõõgi lätt hulga laembas, a om mõnõst kotussõst õks peris matal. Kõrra jääs paat põhja kinni. Toukami mõlaga hinnäst valla.

Ilm om väega illos. Ei olõ kuum ja pia nakkas ka vihma sadama. Pikkä aigu om olnu põud, taad vihma om väega

vaia! Ja sõidu aigu tulõ taa nii tassakõistõ, et ei sekä sõitmist sukugi. Rõiva saava kül likõs, a tuult ei olõ ja külmi ei nakka.

Paari tunni peräst om mi paadin tsäägatamist veidembäs jäänü. Sõudja nakkasõ väsumä ja sõit saa kah kõrrast inämb selgembäs. Ja sis äkki tulõgi Korgõperv, kost tsipa edesi maa pääle läämi. Tuud tsipakõist maad (Sika Alari jutu perrä 300 miitret) sõidami üt puul tunni. Arvada omma nuu maamehe miitre, minka Alar tuud maad mõõtnu om.

Vihm lätt kõvõmbas

Maa pääl lätt vihm kõvõmbas. Andas hernesuppi ja kõnõldas, et tuu ollõv Sika Alari hindä keedetü. A anomidõ pääle, kost seest suppi jactas, om kirotoõ Jaagumäe.

Tuli om ütles tettü, inemise lämmistäse ja kuivatasõ hinnäst. Perämäidsi paatõga jõudva ka kõrraldaja esi, Sika Alar ja Riisi Jaan. Alar käü, tark nägo pään, ümbretsõõri ja küsüs, kas kõik om kõrran ja kas kõik omma suppi saanu. Miilegiperäst om taad jandalit kaema

tuulnu ka Kersna Vahur, timä tege pilti tuust, kuis Sika Alar suppi süü. Kersna-poiss om puhanu näoga, tuu jääs väsunüide paadisõitjido kesken silmä.

Tulõ veeren om viil jututamist, sis sõit Omnibuss üle Valga Tarto pääle. Mul ei olõ ei Valka ei Tartolõ asja, jää kaema, miä edesi saa.

Edesi tulõ ütõs tunnikõnõ tüüd. Paadi kõfatas kokko, osa lastas tühäs, mõla ja pästevesti kõfatas kokko, kõik kraam pandas autokäro pääle ja väiku bussikõnõ nakkas käroga kõkkõ tuud kraami är vidämä. Üts kinä puulpäiv nakkas läbi saama.

Väega hää om olla, puhanu inemise tunnõ om pääl. Esieränis hää miil om tuust, et säänest ilosat päivä Ruitlasõlõ es kingi.

Võrolõ saa Land Cruiseri džiibiga, Sika Alar roolin. Alar pand Jää-ääre kasseti mängmä. Väiku väsumüs tüküs mullõgi pääle. Om aig kullõlda InBoili laulu ja tsipakõsõ hindä sisse kaia.



Inne vii pääle minekit. Sika Alar and oppust, kuis hinnäst ütlen pitä.

RAHMANI JANI PILT

Kae Internetist:

Looduse Omnibuss www.looduseomnibuss.ee
Sika Alari matkklubi www.asmk.ee

